



PÓST- OG FJARSKIPTASTOFNUN

Ákvörðun nr. 24/2008 um afturköllun tíðniheimildar Digiweb Ltd. og afskráningu fyrirtækisins

I. Boðun ákvörðunar

Digiweb Ltd. er skráð fjarskiptafyrirtæki á Íslandi í samræmi við 4. gr. laga um fjarskipti nr. 81/2003 og hefur fengið úthlutað tíðniheimild fyrir háhraðaaðgangsnét á 3,5 GHz tíðnisviðinu til að veita gagnaflutningsþjónustu, dags. 25. október 2006.

Vegna langvarandi og ítrekaðra vanskila Digiweb á gjöldum, sem fyrirtækinu er skylt að greiða samkvæmt lögum, var fyrirtækinu tilkynnt bréflega, dags. 16. september 2008, að Póst- og fjarskiptastofnun (PFS) hygðist afturkalla fyrrnefnda tíðniheimild og fella niður skráningu þess. Var umrætt bréf sent í ábyrgðarpósti til fyrirtækisins í Sviss og jafnframt í tölvupósti til helstu tengiliði fyrirtækisins sem PFS hafði upplýsingar um.

II. Málavextir og málsástæður

Í fyrrnefndu bréfi Póst- og fjarskiptastofnunar, dags. 16. september 2008, var Digiweb gerð grein fyrir gjaldskyldu sinni, upphæð útstandandi skulda og til hvaða þvingunarúrræða stofnunin hygðist grípa til ef ekki yrðu gerð full skil á áföllnum gjöldum, sbr. eftirfarandi:

„Samkvæmt 14. gr. a. í lögum nr. 69/2003 um Póst- og fjarskiptastofnun ber Digiweb Ltd. að greiða árlegt gjald til stofnunarinnar fyrir umrædda tíðniheimild, sbr. 1. mgr. 7. töluliðar ákvæðisins. Fyrir árið 2008 nam höfuðstóll þessa gjalds kr. 630.000.

Hefur Digiweb Ltd. ekki staðið í skilum með framangreind gjöld. Innheimta á vegum Intrum hefur engan árangur borið. Upphæð þessara krafna nemur nú kr. 724.605 að meðtöldum dráttarvöxtum og innheimtukostnaði.

Af framangreindum sökum hyggst Póst- og fjarskiptastofnun afturkalla tíðniheimild fyrirtækisins og fella niður skráningu fyrirtækisins samkvæmt 4. gr. laga um fjarskipti nr. 81/2003. Gjöld vegna ársins 2008 verða þó ekki felld niður og skorar stofnunin á Digiweb Ltd. að greiða stofnuninni án tafa fyrrnefnda kröfu að upphæð kr. **724.605**.

Að öllu framangreindu og í samræmi við 73. gr. fjarskiptalaga er Digiweb Ltd. hér með gefinn frestur til 6. október n.k. til þess að standa að fullu í skilum með áfallin gjöld, ella hefur stofnunin í hyggju að afturkalla tíðniheimild fyrirtækisins og fella niður skráningu þess á grundvelli 5. mgr. 74. fjarskiptalaga, sbr. og 12. gr. tíðniheimildarinnar. Er Digiweb Ltd. jafnframt gefið tækifæri innan sama tímafrests að tjá sig um fyrirhugaða ákvörðun Póst- og fjarskiptastofnunar.

Summary in English:

Since Digiweb has failed to fulfill its obligations in accordance with Article 14a of Act no. 69/2003 on the Post and Telecom Administration and pay licensee fees the PTA in Iceland plans



to revoke the company's licensee dated October 25th 2006. **Digiweb has to October 6th** to protest this and send the PTA its comments regarding the above before a formal Decision will be made. “

Við dagsetningu ákvörðunar þessarar hafa engar greiðslur borist stofnuninni vegna umræddrar kröfu að upphæð kr. 724.605, auk þess sem að engar athugasemdir hafa verið gerðar við þá fyrirætlun Póst- og fjarskiptastofnunar að afturkalla tíðniheimild Digiweb af þeim sökum og fella niður skráningu fyrirtækisins.

III.

Forsendur og niðurstaða

Skipulagning tíðninotkunar og almennt eftirlit með sendibúnaði af hálfu Póst- og fjarskiptastofnunar er nauðsynlegt til þess að hægt sé að starfrækja þráðlaus fjarskipti. Þessi þáttur í starfsemi stofnunarinnar miðar að því að tryggja öryggi þráðlausra fjarskipta og koma í veg fyrir truflanir. Þetta er þjónusta við þá sem nota ljósvakann til fjarskipta og því eðlilegt að þeir beri kostnað af þeirri umsýslu sem starfsemin kallar á. Því er kveðið á um lögbundið gjald (skatt) fyrir notkun á tíðnum í 14. gr. a. í lögum nr. 69/2003 um Póst- og fjarskiptastofnun, en samkvæmt 1. mgr. 7. töluliðar eru árgjöld fyrir þráðlaus aðgangsneta sem hér segir:

„a. Fyrir hvert MHz á gjaldsvæði 1 33.800 kr. b. Fyrir hvert MHz á gjaldsvæði 2 22.500 kr. c. Fyrir hvert MHz á gjaldsvæði 3 2.300 kr”.

Fyrir árið 2007 bar Digiweb að greið gjöld samkvæmt þessu ákvæði að upphæð kr. 630.000. (höfuðstóll án vaxta og innheimtukostnaðar). Gjaldþagi greiðslunnar var þann 1. mars 2008. Umrætt gjald hefur ekki verið greitt til stofnunarinnar.

Samtals nemur ógreidd skuld Digiweb, að viðbættum dráttarvöxtum og innheimtukostnaði, nú kr. 724.605. Langvarandi og ítrekuð vanskil Digiweb á þessum gjöldum felur í sér brot gegn 4. mgr. 14. gr. og 7. töluliðar 14. gr. a. laga nr. 69/2003 um Póst- og fjarskiptastofnun.

Í 74. gr. laga um fjarskipti nr. 81/2003 er fjallað um viðurlög brjóti fjarskiptafyrirtæki lög, en í 5. mgr. ákvæðisins segir:

„Þegar fjarskiptafyrirtæki fer ekki að ákvæðum laga, skilyrðum almennrar heimildar, skilyrðum sérstakra réttinda eða einstökum ákvörðunum Póst- og fjarskiptastofnunar getur stofnunin ákveðið í samræmi við ákvæði 73. gr. að fella niður skráningu fyrirtækisins, afturkalla réttindi eða bæta við skilyrðum.“

Með tilliti til langvarandi vanskila Digiweb verður ekki hjá því komist, með vísan til 5. mgr. 74. gr. laga um fjarskipti nr. 81/2003, að afturkalla tíðniheimild fyrirtækisins á 3,5 GHz tíðnisviðinu til að veita gagnaflutningsþjónustu, dags. 25. október 2006, og fella niður skráningu þess.

Skorað er á Digiweb að standa skil á gjaldfallinni kröfu hið fyrsta að öðrum kosti mun Póst- og fjarskiptastofnun höfða mál gegn fyrirtækinu til fullnustu kröfunnar.

Ákvörðunarorð

Með vísan til 5. mgr. 74. gr. laga um fjarskipti nr. 81/2003 er tíðniheimild Digiweb á 3,5 GHz tíðnisviðinu til að veita gagnaflutningsþjónustu, dags. 25. október 2006, afturkölluð og skráning fyrirtækisins felld niður.

Ákvörðun þessi er kæránleg til úrskurðarnefndar fjarskipta- og póstmála, sbr. 13. gr. laga nr. 69/2003, um Póst- og fjarskiptastofnun. Kæran skal berast úrskurðarnefnd innan fjögurra vikna frá því viðkomandi varð kunnugt um ákvörðun Póst- og fjarskiptastofnunar.

Reykjavík, 20. október 2008

Hrafnkell V. Gíslason

Inga Helga Jónsdóttir